

**Saya masuk neraka jika fitnah Dr Mahathir, kata bekas timbalan pengarah SB**  
**The Malaysian Insider**  
**August 20, 2015**  
**By Muzliza Mustafa**

Bekas Timbalan Pengarah Cawangan Khas (SB) Bukit Aman, Datuk Abdul Hamid Bador hari ini menafikan beliau akan membuat laporan polis terhadap bekas Perdana Menteri Tun Dr Mahathir Mohamad mengenai kontroversi 1Malaysia Development Berhad (1MDB).

"Saya begitu menghormati beliau. Saya akan dikutuk dan dihantar ke neraka untuk selama-lamanya jika saya memfitnah beliau. Terseksa roh ayah dan bonda saya jika saya memfitnah beliau," kata Hamid kepada The Malaysian Insider, malam ini.

Ini berikutan mesej diedarkan melalui WhatsApp mendakwa beliau akan membuat laporan terhadap Dr Mahathir sejak pagi tadi.

Mesej itu mendakwa beliau akan membuat laporan tersebut selepas solat Jumaat esok.

"Ia semua sampah. Sesiapa yang melakukan ini adalah bodoh. Saya begitu hormat kepadanya. Dia adalah idola saya," kata Hamid.

Katanya, mesej itu mungkin diwujudkan untuk mengalihkan perhatian rakyat terhadap isu sebenar.

"Ia lencongan taktikal," katanya.

Mengenai sama ada atau tidak beliau akan mengadakan satu sidang akhbar, Hamid tidak memberikan sebarang komen, dengan mengatakan ia akan diputuskan kemudian.

Beliau juga berkata masih belum membuat keputusan sama ada untuk menerima jawatan baharu di Jabatan Perdana Menteri (JPM) ataupun tidak.

Hamid dipindahkan ke JPM selepas berminggu-minggu khabar angin berterusan beliau akan dipindahkan keluar.

"Saya mempunyai masa sehingga 17 September untuk membuat keputusan," katanya. – 20 Ogos, 2015.

Copyright © 2015 Edge Insider Sdn Bhd

Source:

<http://www.themalaysianinsider.com/bahasa/article/saya-masuk-neraka-jika-firnah-dr-mahathir-kata-bekas-timbalan-pengarah-sb>